

Utoqqalinersiaqarneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna Utoqqalinersiaqarneq pillugu Inatsisartut inatsisaat nr. 20, 23. november 2015-imeersoq, Inatsisartut inatsisaanni nr. 24, 7. december 2015-imeersumi, Inatsisartut inatsisaanni nr. 6, 2. juni 2017-imeersumi aamma Inatsisartut inatsisaanni nr. 35, 28. november 2019-imeersumi allannguutitalinni nalunaarutigineqarpoq.

Kapitali 1

Piumasaqaatit nalinginnaasut il.il.

§ 1. 65-inik ukioqalernermermi utoqqalinersiaqalerfiuvoq, taamaattoq tak. imm. 2-4.

Imm. 2. 1. januar 2017-imiit utoqqalinersiaqalernermermi ukioritinneqartut 66-inut qaffanneqassapput.

Taamaattoq kommunalbestyrelsi qinnuteqaateqareernerup kingornagut aalajangiisinjaavoq utoqqalinersiaqalernermermik ukiorititaasut aatsaat 1. januar 2021-imi 66-inik ukioqalernermet qaffanneqassasut inuk minnerpaamik ukiuni 35-ini sulerulunnerup kinguneranik timikkut imaluunniit tarnikkut nungullarsimappat.

Imm. 3. 1. januar 2021-miit utoqqalinersiaqalernermermi ukioritinneqartut 67-inut qaffanneqassapput.

Taamaattoq kommunalbestyrelsi qinnuteqaateqareernerup kingornagut aalajangiisinjaavoq utoqqalinersiaqalernermermik ukiorititaasut aatsaat 1. januar 2025-imi 67-inik ukioqalernermet qaffanneqassasut inuk minnerpaamik ukiuni 35-ini sulerulunnerup kinguneranik timikkut imaluunniit tarnikkut nungullarsimappat.

Imm. 4. Utoqqalinersiaqalernermermi ukiorititanut imm. 2 aamma 3 malillugu qaffaanissamut kinguartitsineq pillugu Naalakkersuisut malittarisassanik ersarinnerusunik aalajangersaassapput.

Imm. 5. Inuit utoqqalinersiaqartinneqareersut utoqqalinersiaqarsinnaatitaanertik annaassanngilaat, imm. 2-3 malillugu utoqqalinersiaqarnermermi ukiorititanut piumasaqaatit naammassineqarsinnaajunnaaruartut.

§ 2. Utoqqalinersiaqarnissamut piumasaqaataavoq qinnuteqartoq danskisut innuttaassuseqarnissaa.

Imm. 2. Taamaattoq imm. 1 malillugu danskisut innuttaassuseqarnissaq atuutissangnilaq:

1) Inunnut Isumaginniinnikkut isumannaallisaaneq pillugu Nunat Avannarluit isumaqtigiiissutaannut ilaasunut, imaluunniit.

2) Inunnut qinnuteqarnerup siunitsianngua sivikinnerpaamik ukiuni pingasuni Kalaallit Nunaani aalajangersimasumik najugaqarsimasunut.

Imm. 3. Utoqqalinersiaqarsinnaanerup atuutilerfiata kingorna utoqqalinersiaqalernissamik

qinnuteqartoqarpat, ukiumi utoqqalinersiaqarnissamik qinnuteqartup pisinnaatitaalerfiani najugaqarsimanissamik piumasaqaat eqquutsinneqarsimassaaq.

§ 3. Utoqqalinersiaqarnissamut piumasaqaataavoq qinnuteqartoq Kalaallit Nunaanni, Nunat Avannarliit arlaanni imaluunniit nunami EØS-ip isumaqtigiissutaanik akuersisimasumi aalajangersimasumik najugaqartuunissaq.

§ 4. Utoqqalinersiaqarnissamut piumasaqaataavoq 15-inik ukioqalerterup ukiumilu utoqqalinersiaqalerfiusup akornanni sivikinnerpaamik ukiuni pingasuni Kalaallit Nunaanni, Qallunaat Nunaanni imaluunniit Savalimmiuni aalajangersimasumik najugaqarsimanissaq.

§ 5. Inatsisartut inatsisaanni matumani aapparisaaq naatsorsuunneqartoq tassaavoq utoqqalinersiallip katissimallugu aapparisaa, nalunaarsukkamik aapparisaa, imaluunniit katissimanermut assingusumik sivikinnerpaamik ukiumi ataatsimi aapparisimasa.

Imm. 2. Utoqqalinersiaqartut inummik utoqqalinersiaqarsinnaatitaangitsumik appaqarlutik inuusut, utoqqalinersianut tapisiaqartinneqassapput utoqqalinersiallimmut kisimiittumut tunniunneqartut annertoqataannik, utoqqalinersiaqartoq aapparisala ukiutut katillugit 300.000 koruunit ataallugit, Inunnut Isumaginninnikkut isumannaallisaaneq pillugu Nunat Avannarliit isumaqtigiissutaat malillugu utoqqalinersiat pensionisallu pinnagit, isertitaqartarpata. Utoqqalinersianut tapit utoqqalinersiallip aapparisatalu isertitaanit toqqammaviusumik aningaasartaat 51 pct.-imik, kr. 183.000-nik ilanngaaserlugit, annikillisinneqassapput.

Imm. 3. Aappaasoq isumaginninnerup iluani ulloq unnuarlu angerlarsimaffimmut aalangajersimasumik najugalittut nuuppat, utoqqalinersiaqartoq kisimiittutut isigineqassaaq.

Kapitali 2

Utoqqalinersiaqarsinnaanngorneq ketersisarnerlu

Utoqqalinersiaqalersarneq

§ 6. Utoqqalinersiaqalersitsisoqarsinnaavoq utoqqalinersiaqalernissamik qinnuteqareerterup kingorna qaammatip aallaqqaataani, aammalu utoqqalinersiaqarnissamut piumasaqaatit naammassineqarsimappata.

Imm. 2. Utoqqalinersianik pisinnaatitaanerup kingorna utoqqalinersiaqalernissamik qinnuteqarnermi, ulloq qinnuteqarfiusup kingorna qaammatip tulliuttup aallaqqaataa aallarnerfigalugu utoqqalinersiaqarsinnaatitaaneq atuutilissaq.

Imm. 3. Siusinaartumik pensionisallit qinnuteqaatitaqanngitsumik utoqqalinersiaqarnermut ikaarsaartassapput, Inatsisartut inatsisaanni matumani utoqqalinersiaqalernissamut ukioqalerneq anguneqaraangat.

Katersineq

§ 7. Tamakkiisumik utoqqalinersiaqarsinnaatitaanermut piumasaqaataavoq 15-inik ukioqalernerup aamma utoqqalinersiaqalernermi ukiussaritinneqartut akornanni Kalaallit Nunaanni, Qallunaat Nunaanni imaluunniit Savalimmiuni sivikinnerpaamik ukiuni 40-ni aalajangersimasumik najugaqarsimanissaq.

Imm. 2. Tamakkiisumik utoqqalinersiaqarsinnaatitaanermut imm. 1-im i piumasaqaat naammassineqarsimanggippat, piffissap aalajangersimasumik najugaqarfisimasap ukiuinut ilivitsunut kingumut akunnaallilerlugu naatsorsornera, aamma ukiunut 40-nut naleqqiullugu naatsorsornera najoqqutaralugit, utoqqalinersiassanik annertussusiliineq pisassaaq.

Kapitali 3

Utoqqalinersiat aningaasartaat

§ 8. Utoqqalinersiat toqqammaviusumik aningaasartaqarput aamma utoqqalinersianut tapeqarluni.

§ 9. Toqqammaviusumik aningaasartat ukiumut kr. 59.900-t angullugit annertussuseqarput.

Imm. 2. Toqqammaviusumik aningaasartat ilanngaateqassapput, utoqqalinersiaqartup ukiumut isertitai maanna atuuttut, utoqqalinersiat aamma Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu utoqqalinersiat ilanngunnagit, kr. 368.286 qaangerneqarsimappata.

Imm. 3. Isertitanit toqqammavagineqartunit utoqqalinersiat toqqammaviusumik aningaasartaat 40 pct.-imik annikillisinneqassapput, tak. imm. 2, kr. 368.286-inik ilanngaaserlugit.

§ 10. Utoqqalinersianut tapeq kisimiittumut ukiumut kr. 74.300 angullugu annertussuseqarpoq, utoqqalinersiaqartumut aappaqartumut kr. 41.300 angullugu annertussuseqarpoq, tak. § 5.

Imm. 2. Toqqammaviusumik tapeq ilanngunnagu, aamma Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat naapertorlugu siusinaartumik pensionisiallit utoqqalinersialillu ilanngunnagit, utoqqalinersianut tapeq ilanngaateqassaaq utoqqalinersiaqartup aappaqarpallu ukiumut isertitai maanna atuuttut katillugit ukunannga qaangiisimappata:

1) Utoqqalinersiaqartumut kisimiittumut kr. 156.000.

2) Utoqqalinersiaqartumut aappaqartumut kr. 183.000, tak. § 5.

Imm. 3. Utoqqalinermi pensionisianut tapeq ilanngaateqassaaq isertitat tunngavigineqartut 35 pct.-iannik, tak. imm. 2, kisimiittumut ilanngaatigalugit kr. 156.000 aamma isertitat tunngavigineqartut 22 pct.-iannik utoqqalinersialimmumt aappaqartumut ilanngaatigalugit kr. 183.000, tak. § 5.

§ 11. Aningaasartat §§ 9-10-mi taaneqartut Kalaallit Nunaata Naatsorsueqqissaartarfia aakinik nalimmassaanermi nalunaarsuutai toqqammavigalugit nalimmassaavigineqartassapput.

Toqqammaviusumik aningaasartat aamma utoqqalinersianut tapeq nalimmassaavigineqassapput aakinik nalimmassaanermi nalunaarsuutit juulip aallaqqaataaneersut qaammatini 12-it iluanni kingullerni allannguutitut naatsorsuinerit toqqammavigalugit. Nalimmassaaneq ukiumut ataasiarluni pisassaaq januaarip aallaqqaataa tulluttoq siulleq aallarnerfigalugu atuutilersinneqartassalluni.

Imm. 2. Ukiut tamaasa januaarip aallaqqaataani aningaasartat nalimmassaavigineqartut Naalakkersuisunit pisortatigoortumik tamanut nalunaarutigineqartassapput.

Kapitali 4

Utoqqalinersianik ukiumoortumik nalimmassaasарнеq

§ 12. Utoqqalinersiat ukiut tamaasa januaarip aallaqqaataani nalimmassarneqartassapput, tak. §§ 9-11.

Imm. 2. Utoqqalinersiaqalersitsisoqartillugu aamma isertitani maanna atuuttuni annertuumik allanngortoqartillugu isertitat maanna atuuttut ilimagineqartut tunulequtaralugit utoqqalinersiat naatsorsorneqassapput. Allannguuteqartoqarnerup kingorna nalimmassaaneq qaammatip aallaqqaataani atuutilertassaaq.

Kapitali 5

Paaqqinnittarfinni il.il. angerlarsimaffiup avataani inissisimaneq

§ 13. Utoqqalinersiaqartoq paaqqinnittarfimmut il.il. angerlarsimaffiup avataanut inissinneqarallarpat tassanilu najugaqarneq pisortanit akilersorneqarpat, aamma utoqqalinersiaqartoq pilersuisussaatitaaffeqarpat imaluunniit angerlarsimaffimmut aningaasartuuteqarpat, utoqqalinersiat allannguuteqassanngillat.

Imm. 2. Angerlarsimaffiup avataanut paaqqinnittarfimmut il.il. sivisunerusumik inissiisoqartillugu tassanilu najugaqarneq pisortanit akilersorneqarpat, qaammammi nuuffiusumi aamma qaammammi tulliuttumi utoqqalinersiat allannguuteqassanngillat, tamatumalu kingorna utoqqalinersiat toqqammaviusumik aningaasartaat 46 pct.-ii tunniunneqartassapput. Utoqqalinersianut tapeq tunniunneqartarpaq qaammammi nuuffiusumi tulliuttumilu atorunnaarsinnejqassaaq.

Imm. 3. Utoqqalinersialik inissinneqartoq, tak. imm. 1 aamma 2, aningaasaqarnermut imaluunniit innarluuteqarnermut aamma peqqilliuiteqarnermut tapeqartinneqarsinnaavoq. Meeqjanut tapisiaqartoqartillugu taakkununnga pisinnaatitaaffik allannguuteqassanngilaq.

Imm. 4. Utoqqalinersialik imm. 2 naapertorlugu angerlarsimaffigisami avataani inissisimajunnaarpat, qaammatip tulliuttup aallaqqaataa aallarnerfigalugu utoqqalinersiat tunniunneqartarneri nanginnejqassapput.

Imm. 5. Angerlarsimaffiup avataani inissisimanermi utoqqalinersianik tunniussisarneq pillugu, ilaatigut paaqqinnittarfinni il.il. inissisimanermi utoqqalinersianit ilanngaassisarneq pillugu, kiisalu isumaginninnermi ulloq unnuarlu angerlarsimaffimi inissinneqarnermi nammineq isertitaqarneq pissutigalugu akiliisarneq ilanngullugu Naalakkersuisut ersarinnerusumik aalajangersaassapput.

Kapitali 6

Tapit

Meeqjanut tapit

§ 14. Utoqqalinersialik meeqjanut 18-it inorlugit ukiulinnut pilersuisussaatitaasoq meeqqat ataasiakkaarlugit tapisiaqaatigissavai. Tapit tunniunneqartassapput pilersuisussaatitaaneq toqqaannartumik pilersuinerunersoq imaluunniit meeqjanut akilersuutinik akiliisarnikkut equuutsinneqarnersoq apeqqutaatinngagu.

Imm. 2. Pilersuisussaatitaaneq meeqjanut akilersuutinik akiliinikkut equuutsinneqarpat, aningaasat

akilersuutinik pisinnaatitaasumut toqqaannartumik tunniunneqassapput.

Imm. 3. Meeqqanut tapit meeqqamut toqqaannartumik tunniunneqarsinnaanngillat.

Imm. 4. Meeqqanut tapit qaamatikkaartumik tunniunneqartassapput, annertussusaat Inatsisartut aningasaqarnermut inatsisaanni ukiumut nalinginnaasumik aalajangiiffigineqartumi, taamaattoq tak. imm. 6.

Imm. 5. Pilersuisut tamarmik utoqqalinersiaqarpata, tamarmik immikkut meeqqat ataasiakkaarlugit tapisiaqaatigissavaat.

Imm. 6. Utoqqalinersiaqartoq meeqqanut akilersuutinik akilersuisussaatitaappat, allaanerusumik isumaqatigiissuteqartoqarsimatinngagu imaluunniit piffissami allaanerusumi akilersuinissaq aalajangiunneqarsimatinngagu, meeqqanut tapeq ukioq affakkaarlugu tunniunneqartassaaq. Meeqqanut akilersuutit ukiup affaanit sivikinnerusumik sivisunerusumilluunniit akilerneqarpata, piffissamut tassunga meeqqanut tapeq tamarmiusoq tunniunneqassaaq.

Imm. 7. Meeraasoq utoqqalinersiaqartumi najugaqanngippat, utoqqalinersiutilillu meeqqamut akilersuutinik akilersuisussaatitaappat, meeqqanut tapit meeqqanut akilersuutinik pisinnaatitaasumut tunniunneqassapput.

Imm. 8. Meeqqanut tapit utoqqalinersialimmut Kalaallit Nunaata avataanut nunassissimasumut tunniunneqartussaanngillat.

§ 15. Meeqqanut tapit tunniunneqartarunnaassapput kinguliini patsisissaatitaasoq ataaseq arlallilluunniit eqquutsinneqarpata:

- 1) Meeqqanik inuuuttunillu ikorsiisarneq pillugu inatsisartut peqqussutaat malillugu imaluunniit Meeqqat tapersorsorneqarnissaannut Inatsisartut inatsisaat malillugu meeraq angerlarsimaffiup avataanut inissinneqarsimappat imaluunniit pisortanit 100 pct.-imik pilersorneqarpat,
- 2) Meerarineqartoq ilinniagaqarnersiutisiaqarpat, matumaniaamma sulilluni sungiusarnerup nalaani tamatumunnga malittarisassat malillugit pisartagaqarpat,
- 3) Meerarineqartoq apparminut, nalunaarsukkamik apparminut meeqqamulluunniit nammineq pilersuisussaatitaalerpat.

Innarluuteqarnermut aamma peqqilliuiuteqarnermut tapeq

§ 16. Innarluuteqarnermut aamma peqqilliuiuteqarnermut tapit aningaasartuitinut makkununnga tunngatillugit tunniunneqarsinnaapput:

- 1) Utoqqalinersiallit eqqarsartaatsimikkut timimikkulluunniit annertuumik innarluuteqarneq pissutigalugu immikkut ikorserneqarnissamik pisariaqartitsisunut ikorsiissutitut, Annertuumik innarluutillit ikorserneqarterat pillugu Inatsisartut peqqussutaat nr. 7, 3. november 1994-imeersumi pisinnaatitaaffit naapertorlugit.
- 2) Peqqissutsikkut pisariaqartitat malitsigisaanik annertuumik aningaasartuuteqarnermi, isarussanik pissarsiniarneq ilanngullugu.

Imm. 2. Utoqqalinersiaqartumut Kalaallit Nunaata avataani aalajangersimasumik najugalimmut innarluuteqarnermut aamma peqqilliuiuteqarnermut tapit tunniunneqassanngillat.

Aningasaqarnermut tapeq aamma saniatigut tapeq

§ 17. Utoqqalinersialimmut aningaasaqarnikkut immikkut ittumik ajornartorsiuteqartumut imaluunniit utoqqalinersialik aningaasaqarnikkut annertuumik ajornartorsiuteqalernissaa ilimanateqarpat aningaasaqarnermut tapeq tunniunneqarsinnaavoq.

Imm. 2. Aningaasaqarnermut tapeq, tak. imm. 1, utertillugu akileqquneqarsinnaavoq:

1) Illersorneqarsinnaanngitsumik aningaasanik aqtsinerlunneq pissutigalugu aningaasaqarnermut tapeq tunniunneqarpat, imaluunniit

2) Utoqqalinersiaqartoq aningaasaqarnermut tapinik pisartagaqartoq kingusinnerusukkut aningaasanik piffissamut pineqartumut aningaasaqarnermullu tapit assiganik siunertaqartumik pissarsisimappat.

Imm. 3. Utertillugit akileeeqqusineq aatsaat piumasarineqarsinnaavoq utoqqalinersialimmut tapinik aningaasaliissuteqarnermut atatillugu utertitsisussaatitaanermik ilisimatitsisoqarsimappat.

Imm. 4. Saniatigut tapeq aningaasaqarnermut tapiliunneqartut saniatigut tunniunneqarsinnaavoq aningaasartuutit aalajangersimasut akilereernerini utoqqalinersiallit aningaasat namminneq atorsinnaasaat pillugit kommunip minnerpaaffiliismanera tunngavigalugu.

Imm. 5. Utoqqalinersialimmut Kalaallit Nunaata avataani aalajangersimasumik najugalimmut aningaasaqarnermut tapeq aamma saniatigut tapeq tunniunneqassanngilaq.

Imm. 6. Utoqqalinersiaqartut, tak. imm. 1, ukiumut ataasiarlutik Kalaallit Nunaanni najukkap angerlarsimaffigisapavataanutqanigisaminniktoqusoqartilluguisoqarneranipeqataajartornissamut angalanermut aningaasartuutit matussuserneqarnissaannut pisinnaatitaapput.

Imm. 7. Aningaasaqarnermut tapit aamma saniatigut tapit pillugit, aamma aningaasat nammineq atorsinnaasat ilanngullugit Naalakkersuisut malittarisassanik ersarinnerusunik aalajangersaassapput.

Kapitali 7

Angerlarsimaffimmikiorteqarneqakeqanngitsoq

§ 18. Utoqqalinersiaqartoq angerlarsimaffimminiiginnarsinnaappat angerlarsimaffimmikiorteqarnissamik pisariaqartitsisoqartillugu kommuni akeqanngitsumik innersuussisassaaq.

Imm. 2. Utoqqalinersialinnut angerlarsimaffimmikiorteqartarneq pillugu Naalakkersuisut malittarisassanik ersarinnerusunik aalajangersaasinnaapput.

Kapitali 8

Aqutsineq

§ 19. Inuit Kalaallit Nunaanni najugallit utoqqalinersianut tapiliussaasinnaasunullu qinnuteqaat kommunalbestyrelsimit tunniutissavaat.

Imm. 2. Inuit kommuneqarfiit killilersugaanerisa avataanni najugallit utoqqalinersianut tapiliussaasinnaasunullu qinnuteqaat Naalakkersuisunut tunniutissavaat.

Imm. 3. Isumaginninnikkut isumannaallisaaneq pillugu Nunat Avannarliit isumaqatigiissutaat naapertorlugu utoqqalinersianut qinnuteqaat Naalakkersuisunut tunniunneqassaaq.

Imm. 4. Inuup nammineerluni qinnuteqarsimannngitsup utoqqalinersiaqalernissaa tapiliussaasinnaasullu pillugit communalbestyrelsi suliassamik aallartitsisinnaallunilu aalajangiisinjaavoq.

Kapitali 9

Paasissutissiisussaatitaaneq aamma nakkutilliisussaatitaaneq

§ 20. Utoqqalinersianik tapiliussaasinnaasullu ilanngullugit pisinnaatitaanermut imaluunniit nalimmassaasoqarnissaanut tunngasuni atugarisatigut allannguuteqartoqartillugu utoqqalinersiaqartoq kommunalbestyrelsimit paasissutissiinissaminut pisussaatitaavoq. Utoqqalinersianik tapiliussaasinnaasullu ilanngullugit pisinnaatitaasoq kommunit aggornerisa avataani najugaqartoq Naalakkersuisunut paasissutissiinissaminut pisussaatitaavoq.

Imm. 2. Inuttut aningaasaqarnikkullu atugarisanik eqqunngitsumik paasissutissimanerup kinguneranik pissusissamisuunngitsumik utoqqalinersiaqartitsisoqarsimappat tapisiaqartitsisoqarsimappalluunniit, utoqqalinersialillu ilisimasimappagu ilisimasariaqarluarpaguluunniit pisussaatinneqartussaanani, aningaasat pisassarinngisat utertillugit akilerneqarnissaat piumasaqaataasinnaavoq imaluunniit utoqqalinersianit ingerlaavartumik akilersorlugit ilanngaatigineqarsinnaallutik.

§ 21. Utoqqalinersianik tapisiaqartitsisinnaanermillu tunniussisarnermi kommunalbestyrelsi nakkutiginnissalluni pisussaatitaavoq.

Kapitali 10

Tunniussisarneq

§ 22. Utoqqalinersiat aamma tapiliunneqarsinnaasut tunniunneqartassapput qaammatikkaartumik siumoortumik.

§ 23. Utoqqalinersiallip aningaasaqarnerminik aqutsisinnaannginnera kommunalbestyrelsimit missiliorneqarpat utoqqalinersianik tapiliunneqarsinnaasunillu pisartakkanik aqtsinissamik kommunalbestyrelsi aalajangiisimmaavoq.

Imm. 2. Imm. 1 malillugu aalajangiinerup kingunerissavaa utoqqalinersialinnut ataasiakkaanut malittarisassat suleriaatsillu nalinginnaasut saneqquillugit tunniussisarneq kommunip aalajangiiffigisimnaagaa, utoqqalinersialik sukkulluunniit aningaasartuutinut aalajangersimasunut aamma inuuniarnerup attatiinnarnissaanut naammattunik akissaqartissinnaaqquillugu.

§ 24. Utoqqalinersiaqarnissamut piumasaqaataasut eqquutsinnejunnaarpata utoqqalinersiaqartitsineq qaammatip tulliuttup naaneranit unitsinnejassaaq. Kalaallit Nunaat qimallugu nuunnermi qaammatip nuuffiusup naanerani utoqqalinersiaqarneq unitsinnejassaaq, nunanut avannarlernut imaluunniit nunanut allanut EØS-imik isumaqtigisuteqarsimasunut nuunnermi utoqqalinersiaqaaannarnissamut piumasaqaatinik eqquutsitsisoqartoqartillugu eqqaassanngikkaanni.

Imm. 2. Utoqqalinersiallip maqaasineqarluni nalunaarutigineqarneranit qaammatit pingasut qaangiunneranni uumaneralu uppernarsarneqarsinnaanngippat utoqqalinersiaqartitsineq qaammatip tulliuttup aallaqqaataanit unitsinnejassaaq.

Imm. 3. Utoqqalinersiaqarneq atuukkunnaassaaq utoqqalinersiaqarnerup unitsinnejarneranit ukiup ataatsip qaangiunnerani utoqqalinersialik suli uumanersoq uppernarsarneqarsinnaanngippat.

Imm. 4. Utoqqalinersiallip toqukkut qimagunneranut atatillugu § 5, imm.1 malillugu aappaqarsimappat,

aapparisimasaanut utoqqalinersiat qammammi toqukkut qimaguffiusup naaneraniit qaammatit marluk tunniunneqassapput.

Kapitali 11

Akiligassannortitsisarneq

§ 25. Utoqqalinersiat aamma tapiliunneqarsinnaasut akiligassanut allatulluunniit pinngitsaalisaasumik akiliisitsiniarnermi pisortanut akiligassaqartoqartillugu taamaallaat attuumassuserneqarsinnaapput.

Kapitali 12

Naammagittaalliuuteqarsinnaaneq

§ 26. Inatsisartut inatsisaat manna malillugu aalajangiinerit Isumaginnittooqarfip aqunneqarnera aaqqissuussaaneralu pillugit malittarisassat sukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Kapitali 13

Aningaaalersuineq naatsorsuuserinerlu

§ 27. Utoqqalinersianut aamma meeqqanut tapinut aningaasartuutit 90 pct-ii Nunatta karsianit 10 pct-illu kommunimit aningaasartuutigineqassapput.

Imm. 2. Aningaasaqarnermut tapit aamma innarluuteqarnermut tapit kiisalu peqqilliuiteqarnermut tapit kommunimit aningaasartuutigineqassapput.

Imm. 3. Utoqqalinersiat aamma tapiliunneqarsinnaasut kommunit aggarneqarsimanaerisa avataani aalajangersimasumik najugalinnut aningaasartuutit Nunatta karsianit akilerneqartassapput.

Imm. 4. Utoqqalinersialinnut Kalaallit Nunaata, Qallunaat Nunaata imaluunniit Savalimmiut avataani aalajangersimasumik najugaqartunut utoqqalinersianut aningaasartuutit Nunatta karsianit akilerneqartassapput.

Imm. 5. Matumani Inatsisartut inatsisaanik aqutsinermut aningaasartuutit oqartussaasumit akisussaasumit akilerneqartassapput.

Imm. 6. Utoqqalinersialimmumt angerlarsimaffimmi ikiorteqarneq kommunimit innersuussutigineqartoq, tak. § 18, utoqqalinersialimmumt akeqanngilaq, aningaasartuutillu kommunimit akilerneqartassapput.

§ 28. Kommunit naatsorsuutinik saqqummiussisarnissaat kukkunersiusarnissaallu pillugit malittarisassat ersarinnerusut Naalakkersuisunit aalajangersarneqarsinnaapput.

§ 29. Ukiup sisamararterutaata aamma ukiup ullorsiuteqarfiusup naanerata kingorna kingusinnerpaamik qaammat ataaseq qanngiutsinnagu kommunimi utoqqalinersiaqartut pillugit kisitsisitigut paassisutissat kommunip Naalakkersuisunut nalunaarutigissavai.

Imm. 2. Paassisutissat nalunaarutigineqartussat imarisassaat ilusilersorneqarnissaallu pillugit malittarisassat Naalakkersuisunit aalajangersarneqarsinnaapput.

§ 30. § 27-mi aningaasartuutitut taaneqartunut Nunatta karsianit aningaasaliissutaasussat tamakkiisumik ilaannakortumilluunniit Naalakkersuisut unitsissinnaavaat, §§ 28-29 malillugu aalajangersakkat kommunimit naammassineqarsimannngippata.

Imm. 2. Inatsit una malillugu imm. 1 tunngavigalugu Nunatta karsianit aningaasanik unitsitsineq innuttaasup ikorsiissutinik pissarsinissamut pisinnaatitaaneranut sunniuteqartussaanngilaq.

Kapitali 14

Atortussanngortitsineq

§ 31. Inatsisartut inatsisaat 1. januar 2016 atuutileroq.

Imm. 2. Peqatigisaanik utoqqalinermi pensionisiat pillugit Inatsisartut peqqussutaat nr. 3, 7. maj 2007-imeersoq kingornatigullu allannguutit ilanngulligit aamma Utoqqalinermi pensionisiat pillugit Namminersornerullutik Oqartussat nalunaarutaat nr. 14, 27. juni 2007-imeersoq atorunnaarsinneqarput.

Inatsisartut inatsisaata nr. 24, 7. december 2015-imeersup (§ 5, imm. 2 malillugu isertitat toqqammavagineqartut naatsorsorneranni aamma utoqqalinerianut tapit nalimmassarneqarneranni utoqqalinersiarineqartut aammalut lunnut lsumaginninnikkut isumannaallisaaneq pillugu Nunat Avannarliit isumaqatigissutaat naapertorlugu utoqqalinersiarineqartut ilanngunneqartassannginnissaat pillugu.)[\[1\]](#) atuutsilernissamut aalajangersagaq una imaraa:

§ 2

Inatsisartut inatsisaat una ulloq 1. januar 2016 atuutilissaaq.

Inatsisartut inatsisaata nr. 6, 2. juni 2017-imeersup (Inatsisip kalaallisut oqaasertaani § 17, imm. 6-imut aaqqiissut)[\[2\]](#) atuutsilernissamut aalajangersagaq una imaraa:

§ 2

Inatsisartut inatsisaat una ulloq 1. juli 2017 atuutilissaaq.

Inatsisartut inatsisaata nr. 35, 28. november 2019-imeersup (Utoqqalinersianik ikilisitsisoqartinnagu aningaasanik innuttaasup akissarsiarisinnaasaanik qaffaaneq)[\[3\]](#) atuutsilernissamut aalajangersagaq una imaraa:

§ 2

Inatsisartut inatsisaat una ulloq 1. januar 2020 atuutilissaaq.

Isumaginninnermut Inatsisinillu Atuutsitsinermut Naalakkersuisoqarfik, ulloq 28. februar 2020

Julie Præst Wilche

/

Trine Foldager

[1] Inatsimmik allannguineq § 5, imm. 2-mut tunngassuteqarpoq

[2] Inatsimmik allannguineq § 17, imm. 6-imut inatsisip kalaallisut oqaasertaani tunngassuteqarpoq

[3] Inatsimmik allannguineq § 5, imm. 2-mut, § 9, imm. 2-mut, § 9, imm. 3-mut, § 10, imm. 2, nr. 2-mut, § 10, imm. 2, nr. 3-mut, § 10, imm. 3-mut aamma § 15, imm. 1, nr. 1-imut tunngassuteqarpoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut